



南齋集卷六

祁門 馬曰璐

秋日邀錢坤一太史沈學子上舍集行菴題

王酉室梅花水仙卷子

水仙梅花影凌亂清氣霏空出柔翰問誰畫者王
山人彛齋煮石能逼真秋雲一縷墮地白姑射江
妃各媿嬾墨花飛舞何精神知我席上延嘉賓詩
人之顏總冰雪留對歲寒稱晚節

分題徐侯齋所畫吳中名勝得華山

鳥道一山勝盤空昔曾上身落屏障中幽境失俯



仰茲圖誰所爲向我發清響寒泉激雲濤逸翮入
松網惜哉筋骨衰不得理孤榜猶喜高士蹤閒庭
對秋爽卽此坐其下足當山阿賞浩浩隔煙江人
間總蒼莽

九日竹西亭登高得語字

壺觴宜幽人日月疾過羽重九無佳遊巖谷退有
語况欣天宇清更復偕勝侶虛亭一臨眺極望遍
今古悠悠水度雲拍拍鴈飛渚耳目旣閒曠物象
亦容與點點隔江山翦翠入靈府吟罷夕煙橫樊
川渺何許

晚菘

菘以秋深美連畦摘未殘青青擁霜露頓頓入盤
餐尚儉淡逾足無求飽亦安此中有真味掩卷試
嘗看

題禪智寺乞米疏後

瘦竹圍精廬不爨亦心遠啾啾空林雀就掌飢求
飯莖草誰與施鉢花易爲滿他日訪枯禪長廊聞
粥板

送勉之太史歸吳興分詠古蹟得西塞山

元真來往處山繞霅溪流釣艇三春暮蘆花九月

秋煙波長浩浩風雨任悠悠歸去懷高隱吟詩狎
白鷗

冬日集晚清軒適有以鶴餽主人者因同用
劉貢父觀歐公廳前雙鶴韻

海雲生空庭寒露滴巖骨軒然苔階前忽睹寥天
物一聲清唳自爲羣密柴低籠那可馴逸翮蕭閑
類君子長身磊落依詩人何時重來看舞明月下
粉墨無煩更寫真

題張白雲攝山志畧後并示南圻

我昨遊棲霞白雲空有菴不見高蹈人想見書滿

函遺經淪石甕斷志留佛龕奇懷復奇骨聞見兼
搜探豈惟崖窾露益重幽光潛誰歟事采輯舍此
奚發凡書成乞一帙按圖恣逸談

磨兜堅歌

黃琮之黃蒼壁蒼何如玉仿金人良金人銘辭足
炯戒遠訓終屬非羹墻度長盈寸闊盈黍琢法寧
和翁仲伍土花灰暈碧血斑如見周防歷千古作
佩來隨君子身守默同爲席上珍試看安樂能無
事不慮明神更伺人

寒宵煎茶圖

南齋集 卷六 三
密灑竹間雪淡吹松下風蕭蕭復索索併在一庭
中吟苦神爲醒燈深境亦空何當拾殘葉自起課
奚童

孟亭太守至自金陵集晚清軒卽次其與程
南陂郎中倡和韻

相思明月隔江沙星紀剛周蕙吐芽

時適有以冬
蕙作供者

寒影

一簾來遠客古香滿硯屬詩家雲分建業清依鶴
水汲中冷淡煮茶聚散經年同白首喜君高論絕
津涯

雲陰釀雪復集行菴倒用前韻

光陰無定趣無涯良醞重開欲毀茶黃葉飄殘謝
傅宅濃雲布滿梵王家人如寒鴈尋泥爪詩藉清
禪長道芽來日可能成白戰空林還聽蟹行沙

孟亭將返秣陵同人復留一日仍疊前韻

天外雲鴻聚浦沙心源不竭發靈芽酒痕未遍題
襟處詩筆爭傳好事家珍重寒潮休促擢殷勤活
火更煎茶也知此別無多日梅柳江春隔水涯

重展行菴文讌圖

行菴高會處清景墮寒煙檢點圖中舊伊誰髮尚
元晨星感今日鄰笛怨當年見在身須惜擎杯一

慨然

送謝山歸里

握手意蒼涼爲君惜景光獨吟燈下句已少酒邊
狂固疾乘時療衰年欲別傷丁寧南去鴈風雪伴
歸航

斷鍼吟爲李道南母夫人題

斷鍼斷鍼母心摧兒淚垂一燈如豆無見期十指
流血鍼知之嗚乎兒學縱成兮母亡何爲

乙亥人日集山館

佳攜值辰靈雅咏生意愜正元惜遽馳日七欣乍

涉晴雲靄廊腰殘雪涸庭頰春陽已暉暉寒吹尚
獵獵新景發故交萌草茁舊屨瓶插古梅枝爐燒
敗竹葉忘形酒三升留客菜一櫟年驚疊鼓催頭
白綵勝帖只有心無營時覺古可接相與共登樓
高歌岫重疊

正月十五日集山館用東坡次劉景文上元
韻

詩人如散仙來自羣玉府華燈映圓月每憶輒歡
舞令節屈上元良朋復三五舊事茲更新前跡可
接武況值氣候和春風聚看宇如此樂上樂冷韻

古未睹酒波對客翻疎花當坐吐燭跋慎毋歸無
慮促街鼓市聲同一喧爐香剩幾縷相與顧青紅
吟遲慚阿父

乙亥上元聯句

佳節天涯喜盍簪朱稻孫山齋四度復聯吟馬白瑄地分吳

越皆知已張世進詩壓齊梁是雅音馬白璐春月初圓花照

夜陳章清歌不斷酒盈襟閔華燈前底用看雙鬢陸鍾輝行

樂年年共此心孫稻

正月十九日飲梅花下

梅花竹裏無多樹繞樹閑吟滿袖風莫倚花開人

未覺五分香散冷雲中

一朶花前酒一杯疎枝低亞長莓苔不知花好人

能健消得殘年幾度來

雨中集依袖齋

高齋舊遊地曾此娛清暉廿年重至止碧樹增新

圍主人手一編當春開雙扉寒香煙際疎濛雨花

中微茶聲不離竹可以終日依徘徊復徘徊雲葉

緣階飛

晚清軒看鶴舞

晚清軒中鶴三隻飲啄時時向空碧主人能適鶴

性情放令苔階振雙翮今朝會舞梅花前低昂進
退高盤旋逸勢軒軒如赴節瘦軀落落疑冲天有
時橫過清池冷回顧同羣自惜影不飛不鳴豈媚
人萬里居然在俄頃吾聞支公愛鶴不作耳目玩
羊公瓌璋何足算他時養就解凌雲月夜乘閑更
訪君

竹徑殘雪江賓谷陳竹町朱稼翁同作得山
字

殘雪消不盡留在深竹間竹深杳無人
有客適叩關清艷引幽步素色照瘦顏
春禽既已鳴春雲亦

時還陰淡白日晚寂歷疎梅開如何此流玩
冷咏疑空山

二月五日風日清美殘梅在樹偶爾郊行隨
寓而適同人各成四十字分韻得船字

一步一留連風和日麗天湖光新雨後山態落梅
前霽雪香吟屐幽林淡茗煙閒心正無盡况不負
觥船

過讓圃看落梅

鳥語度長廊梅花落不妨辭枝寧有怨到地尚餘
香脩竹深三畝青苔冷一方誰人知戀此脉脉對

斜陽

賦得一片花飛減卻春

花謝花開少定期十分春事暗推移憐他着樹續
紛日是我巡簷驗取時見說欲飛難久戀若爲已
減更焉追驚心此際分榮落珍惜何人早得知

送朱稼翁暫返嘉禾

春風一百五有客動鄉愁攜手憑高處青山接秀

州

丙丁連日愁畫甲子今朝喜晴高樹作花寸寸黃
鸝留客聲聲

丹黃暫輟掩經帷獨向空江打槳時想及月波春
酒熟不關煙雨亦相思

舟次復一絕奉柬

歸途還借一帆風襟被何愁說屢空料得遺經收
拾盡不孤心力往來中

春日集抱山堂簡泚江太史

半春握手從君後日共哦詩欲避難常羨身如孤
鶴健幾曾花讓別人看一軍鵝鶴寧甘斂六曲屏
帷想獨安賴是筠筒來往熟笑談還不阻清歡

集山心齋疊前奉簡韻

春光半去追何易清興常饒續不難才接琴書先
一笑爲詢眠食各相看雲龍自昔慙東野詩句何
人証道安長水上人適至杯酒倍還花倍賞依然同作十分
歡

西疇邀往郊園看牡丹因雨未果移酌山館
三年不唱縷金衣怪底輕雲作雨飛多少花頭任
閒卻一牛鳴地想依稀

等閒移興豈關春羞澀花前愧主人莫道山窗無
氣色紫囊紅幙入詩新

西賓東主漫相嘲酒榼還期隔日招爲語狸奴好

護取畫圖重倩劔南樵

立夏後一日雨過西疇

不畏霑衣濕翻憐着屐輕綠疇朝雨過深柳酒人
行五里野塘白一庭花氣清何當各乘興得會此
幽情

窗戶煙霏裏纖埃那得侵香曾縈昨夢雨不厭清
吟春色閒中盡芳華淺處深爲言欲歸客晴意滿
前林

乙亥孟夏重晤方息翁

如虹豪氣尚依然筆陣詞鋒老益堅淮海綠天逢

一笑樅陽梁月夢三年嘯歌仍是當時侶蛩駉還
期後此緣欲續江關舊吟卷尊前緩唱渭城篇

懷謝山

雪裏送君返相思夏又臨刀圭千里夢風雨一春
心未得山中信空彈石上琴叢書尚相待愁滿徑
苔深

哭泚江太史

東南槃敦凋零後端藉先生一手持會有煙雲歸
舊句曾無風雨間前期書籤琴薦看仍在硯具爐
熏卒未移寧料蒲葵虛夙約哭時準擬是歌時

何處平生跡最親青苔門巷往來頻燈前覆罷吳

圖冷

時與二先兄楸枰對局至夜不輟

卷裏箋殘錦瑟新

義山詩註予與三兄曾採詩話數十

條附刻卷內

近日交遊非白首故家風義失斯人從知名

秩尋常事祇為情深淚滴巾

優游故里樂林泉忘卻清班是上仙移樹尚憑韋
少府茸亭曾續杜樊川可憐白鶴歸來日剛是疎
篁結蔭年忍看閑房詩板在暮帆馳影落平田

通親謬託春前木姻舊重申葭內葶方喜生成梁
上燕忍聽啼血夜棲烏他年羊酒憑誰主此日琴
書一愴吾

數日前曾以四書文授兒輩

手採白蘋花作薦夜臺幽獨

南齋集 卷六
更吟無

雨餘邀張瓜廬集行菴

客來梅雨歇藏濕在林梢照坐苔痕古當軒竹翠
交雲開呈暮色心寂戀香茅不盡幽人興臨風數
雀巢

仲夏同程風沂給諫王壽民比部家兄懈谷
題東坡先生海外石刻像卽用寫真何充秀

才韻

時宰消沉如掣電當日相攻劇刀箭居非人境心
泊然行歌來往海上山堂堂古貌歷百世流風尚

滿天壤間八州之督是何物只有僧伽識踪跡笠
屐無煩手重摹刻劃蒼巖更恬適黨錮從來世莫
容太息元符紹聖中淵明詩共范滂傳急雨清風
一拜公

哭先兄十絕句

天荒地老此時情何處重逢白髮兄只有素帷相
近分夜燈涼雨夢平生

垂老何曾一日離傷心折翼兩參差空留手跡如
新在宛似丹鉛對校時

世路羊腸劇可憐危機脫後荷安全而今翻憶羊

腸險回首青徐一愴然

近遊長共上吳航攬勝探幽每挈將腸斷蓬窗聯

句處青山何限水茫茫

經窗風景近如何贏得尋思涕泗多滿地蒼苔滿

林葉更無人過舊行窩

手移脩竹已成林石角廊腰足苦吟獨坐空亭誰

共語風前寒玉起哀音

風木含悲歷幾年衰微門祚尚蕭然那堪泣盡臯

魚血又對秋琴哭絕弦

吟詩曾念五齡兒今日麻衣是阿宜地下有知差

少慰可能不怨鬢成絲

小姪五齡兒阿伯鬢成絲皆先兄喜聽振伯誦詩句

家乘重編清淚垂流傳合使後人知世間不少中

山筆逸事何妨有二碑

杭太史董浦為先兄立傳余復据拾遺事擬更乞墓銘

沉疴長與死為鄰賴得相依老此身只恐漂搖風

雨至浮生無幾哭天親

哭于湘

天意高難問纏哀併此時何堪當折翼更復歎焚

芝怛化如容易驚聞半信疑還將自悲淚一為灑

靈帷

先兄遺腹生女詩以傷之

全家凝望半年餘，頌禱相關及里閭。縱得生男非眼見，豈知吉夢又成虛。

依然孤負讀書燈，神理無憑付杳冥。只道玉川宜

有後，一身不換一添丁。

先兄自述詞有添丁詩句，玉川何日纔就句。

移房覓乳憶當年，書寄長安意惘然。今日披帷惟

一哭，八行何路達重泉。

辛未冬日在京師聞生女曾寄詩有覓乳移房累卵君句。

說道勝無足，怨嗟五男曾是屬陶家。寒原彌望皆

冰雪，焦穀何緣再吐芽。

題西疇湖莊春曉圖，圖爲環山筆。

渲染湖莊一瞬過，昔年情事奈愁何。卽今無限鴿

原淚，化作寒雲紙上多。

冬日雅雨先生署中飲羅酒賦此呈謝

平生心艷羅家酒，何幸奇芬入吾口。霜肅官齋似水清，春風滿坐光浮牖。澄波漱灑輕雲撥，沉瀝霏微淡無色。玉碗盛來表裏空，豈易論功與頌德。當筵惟我最淪肌，白鶴觴深況屢飛。就中物象超然處，花發陽和向暖枝。

丙子初夏同人邀杭堇浦太史泛舟紅橋歸

飲行菴分韻賦詩，予以病不獲從，勉成一首。卽以送行得山字。

故人惜別滄江灣九年重見猶昔顏聯吟石壁若
在眼清夢時落波濤間山齋留客感存歿紅橋放
棹乘蕭閑都藍硯具各攜設獨我閉戶如空山涼
雲想見逐波墮殘花怕說衝風還錦圍繡錯亦自
好無奈勝絕驚身孱况復行菴十笏地傷心陳迹
埋青管新筍補林亂無次雜卉臥砌紛難刪相攜
一笑那易得詩情酒興從今慳歸帆緩挂更相約
何緣策杖同躋攀亟聆清論暫陶寫豁若秋霽開
陰頑沙頭竚立君竟去林鳥爲我鳴啾啾

奉題雅雨先生平山高會圖

本不因遊讌堂高盡日淹風清官有暇地勝客無
嫌得句停犀塵看山捲畫簾歐蘇曾未遠遺韻一
身兼

先兄遺稿乞歸愚先生刪定因書其後以代
柬

一首鈔成一淚垂畢生慘澹忍頻開已無緣分同

宵坐

先兄每成一詩輒呼
同燈下共論不輟

剩可流傳見別裁

先生近選國朝
詩曾蒙寓札見索

天爲清名直似妬身遺弱女亦罹災編排得藉詩
人手絕勝叢殘付劫灰

題感舊集後

南齋集 卷六
山林憔悴悉無遺師友平生此見之不獨交遊感
存歿一編淚盡考功詩

詩派江河萬古流先生風教邁前脩手編舊集傷
零落收拾何人似德州

丙子秋日過篠園舊址有感

籬落未全荒西風灑面涼杖扶三徑滑荷散一池
香試覓新碑石都非舊草堂那堪更聞笛孤立易
神傷

繞徑重徘徊殘陽下碧苔昔時攜手處今日獨行
來竹翠荒烟接陂流暗水催年年巖桂好依舊一

枝開

乾隆癸酉季夏同人集小漪南觀荷先兄懈
谷有老卻憑闌幾許人之句閱二年先兄及
園主人先後下世丙子秋獨行至此追憶前
事邈不可得爲之泣然因成四絕卽用爲起
句

老卻憑闌幾許人當時點筆已含辛卽今詩在人
何在只有涼荷瀉露頻

老卻憑闌幾許人虛亭依舊枕湖濱青山白水年
年好不爲時移景不新

老卻憑闌幾許人酒杯茗椀每逡巡那知園主凋
零後不及園丁自主賓園丁石姓如故

老卻憑闌幾許人哀蟬切切語風筠回思四十年
間事不許顛毛不似銀

義門何學士手書所摘着山劔南聯絕冊子
為先兄故篋中物丙子秋杪西疇索觀追感

往昔題詩三首因泣然以和

碎金屑玉襲吳綾淚引秋蛇遍剡藤記得行菴同
展玩只今風颭竹窗燈是冊初見於行菴同人曾賦新竹詩

高岑評與杜陵箋同時更有義門盛唐數家閱本一種閑情託簡編腸

斷白蟬零落盡平陽徒說李青蓮先兄遺腹生女旋殤

來生未結隔今生悔不相從過石城乙亥夏日先兄攜冊同西疇觀於秣陵舟

中來詩及之恍惚故人詩句裏潺湲流水助悲聲

丁丑春暮次玉井韻

端居惟臥疾花覆藥爐深易過三春日難追十載
心吟餘增白髮酒盡失青林忽枉故人句呼燈起

暝禽

觀兒輩習書復疊玉井見簡韻

雙鬢白如此那知春已深身閒諳靜味病久得初
心一室清於水高花香出林兒曹獲古帖臥看學

來禽

題張嘯齋看松圖

夫子尚微道抱素含其芬清穎有幽躅太華傳高
文薄宦詎足戀歸玩蒼松雲陰涼入午夢響逸澄
世氛邈矣歲晏心超然野鶴羣展對適炎序寒翠
落紛紛

力本新居

隙地林木清陰淡若流水夫君樂閒居冲抱有如
此歸裝無長物三徑日料理家具鶴與琴陳書十
篋耳境寂幽鳥來塵空白雲起回首解印前六月

汗如洗雖存廣厦心不聞散髮美何如容膝安悠
然北窗裏

讓圃八詠

松月軒

深林留禪棲松月遙相待不見結茅人清暉在偃
蓋

簡公塔

喬柯蔭石塔其下爪髮藏幽人時往來落葉寒蒼
蒼

蘿徑

南齋集 卷六
憩此綠蘿陰徑曲凡幾轉不知午夢涼但覺冲襟
遠

雲木相參樓

悠悠無心雲轟轟干霄木虛樓羣木間孤雲簷際
宿

遺泉

誰遺花外泉苔滋久不食曉起愛清冷脩綆時一
汲

黃楊館

黃楊本貞材低枝託高館青青一院陰婆娑老霜

霰

碧梧脩竹之間

碧梧高亭亭脩竹寒森森日落微風起滿耳山水
音

梅坪

高低數本梅相過惟瘦鶴寧藉春風吹年年自開
落

和力本謝贈蕉兼乞竹之作

幽人庭戶寂種蕉當夏臨分減半窗綠添君三徑
陰亦有瘦竹竿新烟蓄未深煩君乞竹句爲君起

清音他時遺數本風雨秋來心況君茁蘭芽芳香
蘊深林和氣驗安樂匡坐研古今涼樾前後交彈
文寧相侵慙予草木性因之託同岑倘容襜褕日
逃暑一來尋

荅漁川秋日見柬次原韻

愁疾經年臥詩來一啟關高窗聞過鴈疎樹露遙
山日月催予老琴尊羨子閒因之念疇昔翻感鏡
中顏

簡力本

吾宗老詞客托契如枝連衡宇舊相望兩家接炊

煙自出宰巖邑不見十餘年歸來慕冲素踪跡分
寂喧城東少林木城西饒雲象居卜五畝寬草除
三徑偏于焉託幽鳥于焉揮冰弦酒杯時在手經
卷橫其前卽此亦云樂底須支俸錢人生不滿百
何苦相拘牽况我與吾子白髮各蕭然逸能資壽
考安不羨神仙雖乏濟勝具而有文字緣心懷足
音喜目注風帷褰願身常健在來與日周旋

荅西疇病中詩來問疾次韻

偃蹇長思臥詩來慰寂寥含情當落葉把燭到深
宵我有七年病君殊五石瓢翻因親藥物暫得遠

塵囂

次韻荅陸大田宮庶見簡

花前促席是何時回首行菴淚莫持午夜燈昏空
弔影霜天月落正相思荷公感舊車重過顧我懷
疴鬢久絲同是不堪搖落候斷鴻聲裏阻心期

時抑

齋侍御亦徂謝

次西疇周牧山移榻山館感懷韻

荒齋岑寂長蒿萊風雨經年壁有苔殘簡祇憑良
友檢謂竹町秋燈添照故人來三更清話疑涼夢一寸
愁心付燼灰惟有雲煙能已疾暫時雙眼為君開

題余硯南賣琴圖

彈琴本養性琴去豈容心萬事飛鴻過相思幽澗
深無為傷逸調即此有遺音展卷秋雲暮松風起
碧岑

春日邀竹町對鷗嘯齋玉井山館偶集

杯酒今朝共吟蹤幾載分無由起衰疾偶復對同
羣扶杖林禽喚看梅煙景曛依依如昨日回首悵
春雲

題吳梅查疏泉圖

泱泱山上泉響荅松下風因其疏滌意想見靈源

南齋集 卷六 三
中濡豪洗塵土齋心摘蒙籠淵湛合自然上善與
之通江海有輸委流漱真無窮

次西疇元夜見東韻

四年光景憶聯吟三載睽離酒罷斟老我襟情非
舊日得君詩句見同心雪堆墻角紅燈暗梅放春
空夜月沈只有兒曹樂時節泥人無睡戲庭陰

元夕荅竹町卽次其韻

病坐空齋夢欲成頓忘時節在春城侵寒衣袂逢
南鴈罷酒林亭滯早鶯濕雪仍從階下積紅燈不
似向時明兒曹那識愁人意偏愛鄰家鼓笛聲

病中蒙雅雨先生惠以羅酒烝食賦謝

向時曾忝醉官齋又荷長瓶與札偕明水乍開寒
鑑色帝漿先解百憂懷連朝牽拂邀朋舊到處誇
張羨等儕更有牢丸佐傾瀉流波無盡若清淮

西疇見遺素菊系以詩仍疊丙子年韻因次
以荅

霜寒露潔點初成又荷籬根手種英意得正逢今

歲稔

用邵子種菊詩意而
來章亦有慶秋成語

眼明如挹故人清旋開箬籠雲

腴泛長對深杯玉液盛似此高情當白首誰言同

氣更無兄

蒙詩中憶
及先兄

戊寅秋送南圻之都門謁選

廿年偕嘯詠三載更因依握手稱同調知心悵遠
 違單微愁重負衰疾迫斜暉獨有青雲上脩翎看
 奮飛
 簪組寧關念風塵恐不閒酒斟秋樹外帆挂古河
 灣明月照行色白雲留故山臨岐相贈語名遂奉
 身還

九日同人集竹西亭復送南圻北上

不到五年久重來此送行登高仍往日極目總遙
 情野曠帆移影天空鴈墮聲離杯惜未盡分手暮

煙橫

秋末偶過南莊竹町對鷗秋涇嘯齋漁川有

見簡之作因和

白水洄汀淺黃雲覆隴空聽歌牛健外打稻月明
 中共此農心喜行看歲事終祇余嗟寂寞不與昔
 來同

荅西疇見東南莊

君遊西疇西我往南莊南五里雞犬聞十里雲木
 參遠近夫豈殊欣茲苔逕三人跡不到處會心各
 自諳梅花雖寂寞疎香風中含脩竹無春妍綠淨

比澄潭林間鳥丁寧勸盡酒一甌遙山既可望遠
水亦拖藍胡爲不自適坐失晨光酣况我與君子
白髮成鬢鬢詩來當七發起懶如眠蠶命駕羨嵇
呂託契師僑郊何時約還往花下攜都籃

竹町以詩來乞孟亭使君所寄金陵瓢兒菜

次和

隔江遠致瓢兒菜令我開緘感歲徂只有詩人能
會得不知風味似前無

題西疇詩冊

詩爲息翁評點
冊尾有畫像

展誦令人憶相看已白頭高韋題品在風雨歲時

秋句好鏗金玉情深見贈投等閒無此客長共一
編留

題西疇集亡友詩冊後

雲箋素簡往還同酬唱殷勤宛目中今日吟看兩
行淚蕭蕭愁雨滿寒空

元瑜事往成陳迹子敬聲銷有斷弦多謝高情爲
收拾不令遺恨補亡篇

時輯先
兄遺稿

竹町危疾甫愈卽耽吟不已三疊謝雅雨先
生韻見簡因次其韻以規之

免豪禿盡百龍賓病起裁詩尚爾頻衰後光陰難

白齋集 卷六
得力吟多情性足關身長生不在安神外太瘦寧
非覓句新珍重休輕閒歲月四時常少是陽春

次西疇讀沙河逸老遺稿有感用竹町前韻
忘形誰主復誰賓同調惟君倡和頻一自泥鴻成
往跡空存故紙恍前身心孤夢草傷才盡笛起山
陽入感新賴是長留終寂寞可能寒谷更生春

已卯秋日西疇送其子出贅山左謝學使署
十幅雲帆一舸輕向平有願足平生鵲華秋色遙
相待人在鷗波畫裏行

露正滋時月正圓鳳簫雙奏沁寥天崔盧門戶從

人羨底用論量費聘錢

名泉步步沁心脾風物明湖合有詩想見阿翁瀟
灑甚芙蓉橋畔擘箋時

歸日庭幃禮教脩外家風範有來由佳兒況是珪
璋器相顧真堪慰白頭

哭竹町

一從骨肉彫殘後白首相依似鴈鴻方藉酸文銘

宋弁余前臥疾曾囑設奄忽以歿當爲作誄豈知靈藥誤韓終功名無意

詩篇貴砥礪何人友道窮不忍叢書樓下過斷箋
零墨委塵中

回首聯吟跡總陳筆牀茶竈亦離羣攝山秋月歸
殘夢笠澤春帆付斷雲已是晨星悲故友那堪鄰
笛入愁聞傷心墜雨知何限更恐無人詠五君詩會

中逝者十人曾兩作五君咏以傷之近君與息翁又先後下世存者僅三數人而已

庚辰春仲偶坐兩明軒有懷南圻京師

寂寂春將半花開有所思惟憑淮甸月遙寄白雲
司奉職知多暇銜杯欲共誰吟餘還憶否燈翦竹
窗時

暮春西疇約過山館看藤花因雨不果簡以
詩次韻以和

花下誰賓主吹香客擬來候門童有約移輿徑先
開何意廉纖雨偏妨潑灑杯不知重過日何計挽
春回

過秋雨菴

一菴當遠岫幽寂自為鄰竹密疑無徑琴橫識有
人時值漁川先往涼陰渾似水濃馥不關春茶話成閒憩忘
機鳥下頻

和西疇山莊看桂見東原韻

自攜竹杖自行歌各有田園奈老何寒桂不禁三
日賞清吟已隔二年多戊寅春曾有村莊倡和作金人戒切新緘口

南齋集 卷六
藥裏緣深舊病魔賴得此身還好
在乘閑休負數相過

荅西疇村園夜月見懷因憶焦山洞庭諸昔
遊之作

誰能明月下而不憶吟朋况是霜初落還當檻獨
憑橫江飛夜鶴傑閣話吳僧一失清光後秋雲隔
幾層

祇此深林靜天空夜境閒喜非千里駕得占一房
山人立虛無外樓明縹緲閒倘容同嘯咏襍被未
須還

題右伊先叔照

吾叔素奇偉懷才恥上書閒居不自得終老復何
如詩格超流品家風重里閭曾蒙憐小阮展拜一
歛獻

辛巳首春雅雨先生招集平山探梅因病未
赴同人以疎影橫斜水清淺暗香浮動月黃
昏分韻得浮字

佳招當歲始名譙開遨頭行將試燈期未遠斜川
遊芳甸十里遙風物和以柔梅花一萬株盛不數
羅浮高高復下下遍插平山幽翠羽已三請松間

語啁啾公攜靈運屐客上陶峴舟倚舷眺錦鏡弭
擢窮麟洲晴雪滿空際白雲香不流高情與勝槩
都向層樓收清吟追往躅良醞傾新篘斜陽半山
紫我公猶淹留娟娟花上月照徹東南州南皮稱
自昔獨愧漳濱劉惟應想像間挹袖夢浮邱詩成
涉擬議未可當獻酬壺觴不及紀聊作鼓缶謳

次韻荅沙白岸

老去崔頽廢卷餘交遊零落更離居霜天乍見西
風鴈蓬戶欣來長者車詩辨古音歸典則名逃空
谷重耕漁瑤華惠我慙相報江表傾心一脊虛

哭南圻

往跡依然在京華竟不歸已傷數載別寧料此生
違旅櫬偕妻妾鄉園剩屋扉重為簪紱誤北望涕
頻揮

壁挂琅琊畫牀披令史書臨岐曾輟贈今日感何
如前北上時曾以麓
臺畫前漢書見遺音斷關河外魂招雨雪餘聞訃時同人設
位哭於故宅

平生故人盡相負首塗初

春晴

百鳥羣飛弄好音春風温煦更逢晴身當 盛世
偏容懶物在陽和自發生為樂欲希秦子勅按歌

况有米嘉榮肯教野外虛吟賞梅放枝頭病足輕
同人集山館寄懷雅雨先生

蜀岡林木鬱蒼蒼北望雲嵐接濟陽獨樂遙知同
涑水冶春誰復繼漁洋寄來良醞新詩健開罷封
緘故意長今日山齋共回首履約留跡在筠廊

南村看桂

桂放今年早來當沙水清香風過南畝涼影落楸
枰意適有餘興境閒無別營偶然逢笑語未厭是
村氓

重過南村

復此留連處經旬信杖來不圖叢桂好依舊一庭
開時羨空鈎鈎從添濁酒杯因之狎鷗鳥微咏未
能回

鄉溝橋展墓

霜風獵獵草蕭蕭白首重來半載遙凝望松楸一
灑淚墓門寒食酒痕消

西山道中

天容如練氣清澄望裏人家興欲乘誰爲斂圖落
農舍白雲紅樹一層層
濺濺澗水繞村流黍稷收殘徑術幽閒過牛宮數

南齋集 卷六
三
雞柵也應不負野田秋

山莊月夜有感

雲鬟玉臂夢無因
淚滴重泉四十春
今夜墳前好
明月月明惟照獨來人

冬日遊鐵佛寺

閒閒平岡遙杳杳
霜鐘寂
金仙閱人代
丹葉下林隙
霸業誰可尋
昔遊歎頭白
無論昨與今
雲寒墮空碧

南齋集卷六終

